



DEO OPTIMO MAX.

UNI ET TRINO,

VIRGINI DEI-PARÆ ET S. LUCE
Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS

*manè discutienda in Scholis Medicorum, die Martis undecimo mensis
Aprilis, Anno Domini M. DCC. LVIII.*

M. NATALI-ANDREA-JOANNE-BAPTISTA
CHESNEAU, Doctore Medico, Præfide.

I.

An Mammarum Canceri ferro tutior, quàm causticis, ablatio?



A MMA, quasi mater altera, ab ubertate ubera. Mulierum mam-
mæ, mulierum venustas, charæ culina prolis. Non malè describun-
tur partes in pectore scæmineo instar monticulorum eminentes ad
humorem lacteum separandum, eumque nutriendæ prolis ergo ela-
borandum & conservandum destinatæ. Cùm mammarum hominis
usus aut nullus sit, aut non satis notus, hinc in definitione illius
mentionem nullam facimus. Illarum præstantior figura hemisphærica est, color al-
bus, substantia consistens; sed notiora hæc, quid illis diutius immoramur? In il-
larum medio pars prominet teres, fungosa & variis circâ extremitatem pertusa
foraminibus, quibus lac erumpit, papilla dicitur. Tenuissimâ obducitur membra-
nâ exquisito sensu donatâ propter innumeras nervorum propagines. Circulus pa-
pillæ circumjectus, areola dicitur; in virginibus pallida, in lactantibus fusca, in
vetulis nigra. Interiorem mammarum compagem efformant glandulæ, pinguedo,
vasa omnis generis & nervi. Glandulæ nihil aliud sunt quàm vasorum glomera,
præsertim ex arteriarum extremis quibus lac, non secus ac semen in testibus,
elaboratur. Glandulas & vasa à se invicem distinguit interfusa pinguedo & mol-
liter fovet. Infinitis arteriis, venisque perfusa est hæc pars, quas mammarias vo-
cant; externæ ab axillaribus prodeunt, internæ à subclaviis. Ab uno quoque fas-

A

ciculo singuli exoriuntur ductus galaetophori secreto lacti recipiendo destinati, qui versùs papillam progrediendo coeunt in ductus majores qui intermediis tubulis inter se conjunguntur, ut obstructo uno in alium transire valeat, ne corrumpatur morâ. Adeste vasa quibus e ductu thoracico ad mammâs immediatè chylus ducatur, commentum est. Fefellerunt quosdam Anatomicos lymphatici ductus non chylò ferendo, sed lymphâ ad ductum thoracicum deferendâ nati. (a) Nervos præcipuè à costalibus habet pars illa quorum ope cum magnis sympathicis communicat. Ex hac brevi expositione facile concludi potest hancce partem ferè totam esse tubulo-vasculosam. Inter multa mala quibus obnoxia sunt mammâs, quæque chirurgico indigent auxilio, nullum cancro crudelius, nullum immane magis, magisve horrendum reperiens. Cùm verò illius sanandi plures sint methodi, hæc eligenda venit quâ citius, tutius & minùs injucundè curatur.

(a) Winslow, exp. Anat. tom. IV.

I I.

CARCINOMA Græcis, Latinis cancer à similitudine, est tumor durus, rotundus, inæqualis, lividi aut plumbei coloris, plurimis vasis circumductus, præsertim venis turgidis, varicosis quæ quasi recurvantur, pallent aut livent. Cùm cancri aqualis diductos pedes quodammodò referat, huic cancri nomen, vel ut aliis placet, quod difficillimè ab iis quas semel obfederit, partibus avellatur non secùs ac cancer aquaticus, animal notum. His primum innotescit signis: circà partis affectæ locum in dies aliqua quasi puncta sentiuntur; primò ad ciceris formam exiguus tumor adest, cum dolore & calore, vel sine iis, temporis tractu crescit ad fabæ vel nucis juglandis magnitudinem, mox majorem in molem sese attollit, tuncque doloribus acerbis ægram torquet miseram, vehementi calore excruciat & adurit, quasi aquâ Stygiâ irroraretur pars affecta, undè cutis & caro laciniantur & exeduntur; demùm cute exesâ, ulcus se prodit visu horrendum, inæquale, labiosis fungosâ carne tumidis, præduris & inversis. Ex eo non pus, non sanies, sed serosa illuvies seu mephitis teterrima, pestilentissimaque exit odoris intolerabilis nauseam non ægre tantùm, sed & astantibus moventis. Cancer in oculum seu non ulceratum & apertum seu ulceratum dividitur. Sedes cancri, omnis glandula præsertim quæ liquorem faciliùs inspissandum habet, vel ratione loci stagnare magis cogit; hinc in oculis, naribus, ore, axillis, inguinibus, pancreate, mesenterio, utero, sæpiùs in mammis illum reperiens. In diversis partibus diversa sortiuntur nomina. Causas habet externas vel internas. Externæ sunt compressio, ictus, topica aliis tumoribus præposterè applicata. Internæ sunt lochia suppressa, naturales evacuationes suppressæ, artificiales neglectæ, undè nimia vasorum ingurgitatio, ex quâ sanguinis & lymphæ stases, galaetophororum ductuum infarctus, inflammatio, lymphaticorum compressio: undè lymphâ moratur, tenuior pars avolat & dissipatur, indurata, concretaque remanet, lymphæ ipsius crassitudo, viscositas, accredo, aer vitiat, alimenta præva indolis, liquores acidi, acres, ipsa animi pathemata ansam præbent carcinomati, non rarò delicta parentum puer immeritus luit. Infelices sanè mulieres tali monstro depastæ, longè infeliciores quibus illo interiora corripuntur; in his enim carcinoma nullam admittit perfectam curationem, sed tantùm prophylacticam & palliativam; in illis si operationi adhuc locus sit, ad eam fortiter te accingas quâ citò curetur, ne vires acquirat eundo; tutò naves operam, ne in vitium ducat culpæ fuga; jucundè fer opem, ne malum malo addas, & diris laniatam, dirioribus adhuc dilanans doloribus.

I I I.

QUANDONAM suscipi debeat operatio, quando non, disputent qui illam omninò (b) respunt & qui eam in certis casibus admittunt. Nos eam plures ægrotantes ab orco revocasse multorum melioris notæ in arte medicâ Magistro-

(b) Vid. præclar. Thefes DD, Sæon & Rencamp, quarum altera negat, affirmat altera.

rum auctoritate, ratione seu morbi naturâ, experienciâ tandem edocti aptiorem illius conficiendâ modum inquirimus. Ad huncce morbum debellandum, triplex armorum genus in usum vocatum fuit, ferrum scilicet, caustica & ignis. At propter crudelitatem & insaufos eventus, jamdiu obsolevit ignis usus. Cur non eadem ratione caustica ablegantur? In hoc totius negotii cardo vertitur, ut tantum cutis, si sit intacta, fervetur, quantum fieri potest; ut muscoli pectorales integri remaneant, ut quælibet glandula morbo affecta extirpetur; verbo ne partes sanæ frustra auferantur, morbosæ remaneant. Porro quis talem provinciam causticis demandaverit? Neque quis dicat, cum mitiora sint & validiora, hæc aut illa pro morbi gravitate esse eligenda. Quis enim caustici naturam sic calluerit, ut ejus effectus ad arbitrium moderari valeat? Si mitiora, muneri propolito fient imparia; si corrosiva nimis, quantas strages edent? Effrænum causticum & exlex habenis nullis refrænatur. Quæcumque illi sunt obviæ partes, si vè fontes sint si vè infontes indiscriminatin adurit. Præterea cum in variis subjectis partes magis minùve resistent, magis minùve humoribus irrorentur; hinc caustici vis augetur aut imminuitur; hinc circa medicamenti vim, naturam, futuros eventus nihil habetur certi. Quid de nefandis referam doloribus? Dicant ipsæ, si quæ super sint, quæ tam immania perpeffa fuerint mala. Videas miserrimas mulieres integrum diem, quin & plures dies immanissimè cruciari, jactari, ejulare. Sed aliorum dolores floccifaciat doloris expers carnifex: quis illorum effectus non perhorruerit? Quid non mali producere potest nimius, nimiumque protractus dolor? (c) Necessario dolori naturæ vires sæpè sufficiunt, illum prævidet ægrotans, ad illum forti animo ferendum sese paratum præstat. Tela prævisa minù feriunt; verùm succumbunt inutili. Præterea longus dolor vigilias, vigilie perturbatos humorum motus, hi phlegmonas, phlegmones convulsionem pariunt, convulsionem non rarò mors excipit. Verùm quantumvis timendi sint recensiti causticorum effectus multò adhuc perniciosiores quæ sequuntur. Plurimæ medicamenta externè admotà vires suas intùs exerunt. Cicuta diutiùs suprà regionem cordis gestata syncopen atque cardiacam intulisse narratur ab auctoribus gravissimis. Cantharides cuti appositæ renum & vesicæ dilacerationes procreare, mictus sanguineos excitare nemo non fatebitur. Quorsùm autem hæc? ut intelligatur quantas strages productura sint caustica, si semel massæ sanguineæ immisceantur. Quomodo autem non immiscerentur, si parti vasis innumeris conflata comburendæ imprudenti consilio admoverentur. Nonnè totam corporis œconomiam tetris miasmatis brevi perverterent?

(c) M. Feret, des Moyens de former de parfaits Chirurgiens, pag. 10.

I V.

ABLEGATO semel causticorum usu, restat operatio Chirurgica ferro conficienda, ad quam tanquam ad sacram anchoram sit confugiendum. Nam superba nimis specificorum nomina experienciæ minù consona putes. Parce quoque subdolis agyrtarum circulatorumque promissis fidere; nihil enim dignum tanto proferunt hi promissores hiatu. Si igitur nihil contrà indicet; si spes salutis affulgeat, jam mactè animo, ad operationem te fortiter accingas. Verùm antequam manum admoveas operi, præmittantur præmittenda. Depletis vasis liberè fluat sanguis, inspissati diluantur liquores, redundantes evacuentur humores, devii ad normam naturæ dirigantur, suppressæ restituantur evacuationes, insuetæ sistantur. Hisce indicationibus satisfaciendum victu humido & tenui, sanguinis missione, lenientibus, diluentibus, absorbentibus & catharticis: hisce præmissis operationem pro votis cessuram non temerè prænunciabis, modò sequentes sese non præbeant contra-indicationes. Congenitus non sit canerosus humor. Vires operationi sufficient. Pectorali musculo tumor non adhæreat immobilis. Tumor alius canerosus penitioribus in partibus non adsit. Eodem veneno tumentes glandulæ ad axillaria vasa non apponantur. Quibus ritè perpenis susceptum opus, nempè exci-

4
 fionem mammae, cum fiducia aggredere. Si adsit tantum glandula quædam can-
 crum genitura, tum una sectione in longum aut duabus ad se invicem perpendi-
 cularibus vulgò in T facile amovetur. Sed hæc minoris momenti. Verum si eò de-
 venerit mali gravitas ut tota auferenda sit mamma, sic opus conficiendum: in con-
 venienti situ à ministris ægra contineatur, brachium affecti lateris attollatur, ut &
 tumor magis emineat & musculis pectoralis tendatur, tum manu sinistra appre-
 hensus tumor ad radices secetur; si quæ superfit glandula ingurgitata, aut pars
 alia vitiata destruat & abripiatur. Procul hinc fila curvorum acuum ope crucia-
 tum ad anam efformandam inducta. Procul uncini in cancrum injecti ut tumor
 apprehendatur & attrahatur; hæc enim doloris multum, utilitatis nihil important.
 Tum ligatis majoribus vasis linteo carpto minora continentur, absumentur superflua
 humiditas. Adduntur complicata lintea, fasciisque circum pectus convolutis &
 splenio scapulari vocitato totus apparatus continetur & firmatur.

V.

PERPENSIS itaque quæ ex parte causticorum imminet periculis, quorum
 immunis est operatio ferri ope confecta, quis jam illa non perhorruerit, hanc
 verò non eligat? Hæmorrhagiam times? At sæpè nulla est insignis; & si quæ sit,
 facile compescitur. Ligatis enim majoribus vasis linamento solo sistitur, si quis su-
 perfit, fluxus sanguinis. Cæterum nonnè eodem, imò majori periculo obnoxius
 est causticorum usus? Eschara quidem ab iis inducta omnes vasorum hiatus oc-
 cludit; at eadem decedente, nonnè rursus dehiscunt vasa? Hinc obsolevit ferro
 candenti sanguinem cohibendi consuetudo: pari ratione causticorum usus obso-
 lescat necesse est. Paucis minutis ferro peragitur operatio; admotis e contrà cau-
 sticis diem integrum, imò diutius cruciantur ægrotantes; ergò citius opus perfici-
 citur. Ferrum dirigit oculus ne longius, quàm par est, vagetur, nevé quid labe-
 factatum relinquat intactum; causticum effrænum & exlex nullis regulis subigitur;
 si mitius, muneri propositio impar evadit; si fortius, vix ac ne vix quidem coercetur.
 Ergo tutius. Dolor eò crudelior est, quò longior, multò autem longior à causticis
 evadit, aliundè multis obnoxia sunt periculis: ergò minus injucundè. Hanc igitur
 operationem citius, tutius & minus injucundè ferro quàm causticis perficies.

Ergò Mammarum Cancri ferro tutior, quàm causticis, ablatio.

DOMINI DOCTORES DISPUTATURI.

M. Paschasius Boris.

*M. Franciscus Bidault, Rei
 barbaria Professor designatus.*

*M. Hyacinthus-Theodorus Ba-
 ron, Antiquus Facultatis De-
 canus, necnon Castrorum Re-
 gis & Exercituum in Ger-
 mania & in Italia Proto-
 Medicus, & utriusque Phar-
 macia Professor.*

*M. Florentius-Carolus Bellet,
 Professor Regius.*

*M. Joannes-Claudius Munier,
 Consiliarius Medicus Regis
 ordinarius & Domus Regis
 Invalidorum.*

*M. Ludovicus-Maria Pouffe,
 Eques & Censor Regius.*

M. Ludovicus Pathiot.

*M. Ludovicus-Renatus Mar-
 teau.*

*M. Antonius Casamajor, Cens-
 sor Regius.*

Proponebat Parisiis **M A X I M I L I A N U S - J O S E P H U S L E Y S;**
 Audomarinus, Saluberrimæ Facultatis Parisiensis Baccalaureus,

A. R. S. H. 1758,

A S E X T A A D M E R I D I E M.

Typis Viduæ QUILLAU, Universitatis & Facultatis Med. Typographi, 1758.